

Devinâlle

Men permië ét un chieu d'bouéz.

Men deûzième ét qhoq'un q'ét lanbin.

Men trouézième ét eune boule de mouche- a - mië encrayë ô haot d'un chéne.

Men tout ét qhoq'un qi vand ossi ben dés baghèts qe dés miches. **Qhi qué ?**

Le boulangië

Je va vous contë eune dés histouèrs a Michië, un boulangië de haot niviao du qartië de la gâre de Loudia qi vouli fër eune pllaizantri a un bobiâ.

Pelot, de son nom, mé de son fao nom i l'apelin Pëllaod ô son pai su la tête qi d'cend jusq'o j'te dirë pâ ét de mém ersembllance q'eune qheû de renâ.

I c'étaet aroutinë ô son nom...

Pou erveni ô nos berbis, Pelot ét un vieu gâ qi demeure ô fin fond de la forêt de Loudia é qi va ghetë son pain tous lés jous ô son volo ruche a neuf eure un quart... (mé vélà la qhulbutee :)

I régl son afër qe qant i l'a l'temp, é core qant i n'oublli pâ , dés fë...

Mé le merqerdi ilë ne va pâ ersembllë ô zaôts...

Michië avaet mint a cartier eune fâlli baghèt épaise come eune aighul a coude é ossi dur qéla. Ca a été haizant pou lu câr i la paozi dêrère la crézée en pllein sourë é la laissi deûz ou touéz jous...

(I l'avaet pu d'un tour dan sa poche ét ben combinë son coup le maodit farçou.)

Ni yeune ni deûz, l'i vint l'idee de doublë la fameuze baghèt ô la pâte de la perchaine fournee... E la v'la qhèt ben sû, san zoubllië qi l'avaet laisë eune trainee su yun dés chieus, ni vaeû ni conaeû qe j't'embistrouille...

Et come de fë, véci Pëllaod qi rentër dan la boulangrie, i y avaet hardiment de monde le jou lâ...

Mé lu, i të pâ alant, i l'avaet daeû rammasë qhoqhoze, un bourier ou va-ten vër qhi... ça s'vëllë su lu, i të bllan come un linje...

Lés achetous le laisi pâsë devant... Michië lu tandi la fameuze baghèt mé lâ, vaeû dan l'état qé të le personaije, i n'en vouli qe la métië...

J'vous laise emaijinë la têt du boulangië q'avaet pâsë son temp a barghignë...

Moralitë : Ne jamee souzèstimë un bobiâ ...

Louitad